

四庫全書

集部

欽定四庫全書

集部

青谿漫稿

目錄  
卷二

詳校官編修<sub>臣</sub>李堯棟

中書<sub>臣</sub>劉源溥覆勘

總校官庶吉士<sub>臣</sub>何思鈞

校對官中書<sub>臣</sub>范鰲

謄錄監生<sub>臣</sub>朱錫彤

欽定四庫全書

集部六

青谿漫稿目錄

別集類六

明

卷一

賦

辭

樂府

卷二

七言古詩

卷三

五言律詩

五言長律

六言律詩

卷四

七言律詩

卷五

七言律詩

卷六

七言律詩

卷七

七言律詩

卷八

七言律詩

七言長律

卷九

五言絕句

七言絕句

詩餘

致語

卷十

經筵講章

卷十一

奏議

卷十二

奏議

卷十三

奏議

卷十四

奏議

卷十五

頌

表

贊

箴銘

卷十六

記

卷十七

序

卷十八



序

卷十九

序

卷二十

書

說

題跋

策問

卷二十一

碑

神道碑

卷二十二

墓表

墓誌銘

卷二十三

墓誌銘

卷二十四

傳

哀辭

誄

祭文

臣等謹案青谿漫稿二十四卷明倪岳撰岳  
字舜咨由錢唐徙上元中天順甲申進士歷  
官吏部尚書贈少保謚文毅事蹟具明史本

傳岳父謙官至南京禮部尚書明代父子入翰林俱有文集傳世者自謙岳始岳敏而好學居官不徇名譽銓政平允與王恕彭韶等俱為孝宗時名臣史稱其為禮部長貳時禮文制度率待岳而決論事未嘗苟同前後陳請百餘事軍國弊政剔抉無遺疏出人多傳錄之今集中疏議共五十九篇與所謂百餘事者不合疑刊集時已有所刪擇然如正祀

典陳災異及論西北用兵諸奏皆建白之最  
大者已具在其中所言簡切明達得告君之  
體頗有北宋諸賢奏議遺風他文亦浩瀚流  
轉而不屑為追章琢句之習蓋當時正人在  
位為明治極盛之時故岳雖不以文名而乘  
時發抒類皆經世有本之言如布帛菽粟之  
能切於日用亦可知文章之關乎氣運矣乾  
隆四十三年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

青谿漫稿卷一

明倪岳撰

賦

楨陵雪霽賦

天順辛巳

楨陵之為地乃宣平之故疆居帝京之北鄙當朔漠之  
中央為十九衛之都會羌百萬姓之保障池之深兮削  
數仞之峻岸城之堅兮連萬雉於高岡實國家之藩屏

邊陲之禁防者也予親罹患遠謫於斯歲月云邁裘葛  
兩移逝冉冉其秋候屆烈烈之冬期顓帝主令元冥布  
威日雖可愛寒則已祁惟十月之載廿正小雪之應時  
訝滕神之一駕俄濃雲之四垂風聲颯兮凜冽日色慘  
兮蔽虧天地復混沌之始乾坤張醞釀之機犬吠於戶  
雞栖于埭是則天時之向暮而雪意之先施者也頃之  
雲既同風始息一白呈祥六花如席玉龍敗而飛鱗鹽  
虎卧而留跡光搖搖兮撲簾而下聲簌簌兮緣堦以積



萬里飛璫頃刻盈尺予方擁布褐以高眠覺天地之為  
窄既而鐘聲遠度雲影漸開驚譙角之一奏俄旭日之  
東來既晴景之可愛仍吟興之滿懷於是登鎮朔之樓  
俯凌雲之檻驚萬物之不緇縱六合于一覽以言其遠  
也則洋河東逝白虹逶迤燕然南峙王戟參差望飛狐  
之口兮眇琳瑯之委籍顧長城之壘兮積琬琰之崔嵬  
雲中居其西兮皎白雲之縹緲龍門居其東兮粲素練  
之離披以言其近也則粉堞櫛比而有耀鴛瓦鱗次而

生妍銀為城兮闢重門以若璧玉為道兮夾萬井而如  
弦是以三農鼓舞於窮櫛之下莫不占其為大有之年  
也嗚呼是胡為乎然哉蓋是雪之降既當小雪之節且  
值臘前之候后土以之而潤澤宿麥因之而暢茂蝗種  
滅兮誅遺育於泉壤民疫蠲兮獲生全于宇宙衣食遂  
于飽暖田疇易于耕耨則夫是雪以時而降得非佳瑞  
自天而授者乎然而撫玩既久寒威轉惡眚旅舍以來  
歸慨朔風之如割遂呼肴命酒舉觴獨酌圍紅爐擁厚

貉俯仰無拘襟懷恢廓睹豐年之有徵心烏得而不樂  
哉酒既酣乃捧腹而為之歌曰楨陵兮邊城羽檄停兮  
時昇平豐年呈瑞兮達旦而晴諒聖德之所致兮非一  
言之可名

耕藉田賦

二月十六日內閣試題

臣聞籍者蹈籍也人君躬蹈于田也或曰藉者借也借  
人力以終之者也蓋人君事神明勸農務禮之不可缺  
者焉粵昉于周有典有則然弄于漢昭廢于晉惠禮其

素矣開元肆赦端拱錫爵禮其瀆矣爰稽舊章夫何足  
取之肆惟聖皇以即位之明年改元成化採春分之令  
辰舉耕藉之大禮誠有以超往古而軼成周者也臣叨  
職明時躬逢盛美望朱紘之光聽鑾輅之音雖無雅頌  
之才以繼載芟良耜之作然宣鴻勛推明效竊有志焉  
謹拜手稽首而獻賦賦曰

欽惟皇明受天休命我高祖乃御神龍而奮飛感民心  
之丕應揮天戈而九鼎歸一戎衣而四海定於是創制

立法叙禮和樂廼輯民生廼求民瘼式命耆宿朝以望  
朔天顏俯臨誨諭諄恪念無逸稼穡之難考周禮天官  
之制而耕藉之禮所由以作也欽若太宗宣光重離拯  
頽綱以復振撫皇運以雍熙穡事惟重憲章是稽昭皇  
章皇善繼于茲英宗當天務農不遺亦有事于千畝嘗  
輟勤于萬幾迨我聖皇紹統率舊不愆鴻恩滂漉海隅  
覃延大明重熙成化紀元王正之吉禮崇祀天乃追五  
朝之著令開千畝之藉田維時仲春土膏脉起東作方

興宜事疆理帝乃御前殿頒曆旨將順時以勸耕舉先  
農之祀禮先期致齋省心潔已於是冬官撰播殖之器  
則維耒維耜其製孔嘉維朱其柄維金其牙烜赫巧麗  
流耀生華錦衣列鹵簿之駕則越象重寶宛馬玉輅羽  
旄連空旌旗拂露飛蓋方圓執戈上下肆續紛而雜沓  
備乘輿之服御維彼圉官耕犢謹飼角端領厚首巨形  
魁飽以芻粒絡以青絲俟當舉趾驅馬以隨若乃師旅  
列衛都門戒嚴萬騎駢駐兵矛利鍔京師警肅聳乎具

瞻是日也雞鳴告晨尚衣盛服免視朝于百辟迎扶桑  
之朝旭帝乃出宮時暄景淑於是駕蒼龍遵皇衢士女  
快覩臣工奔趨貌貅雷動而方駟驂騶魚麗而前驅和  
鸞鏘鳴劍佩陸離亦曰至止維田之墟駐皇轡以歷覽  
睠猷畝之有制溝洫決乎四同疆場連乎無際町塍基  
布原隰鱗次甫縱觀之方周俄陳滌之已備觀夫巍巍  
青壇築之東方奠裸既列執事雁行帝乃御袞冕鏗珩  
璜秉圭璧將幣筐以享以祀維牛維羊精誠通乎冥冥

雅樂奏乎洋洋異先農之歆格祈我田之既臧神曰不  
留雍徹以退帝降靈壇乃撫御耒耜轅既駕黃縑斯委  
青原俶載沃壤維融司農陳青箱內宰奉稂種民耆相  
犁以先邁司徒執策而後從乃舉玉趾乃披蒙茸澤澤  
其耕南畝之中我疆我理必親必躬展盛禮于三推效  
勞役于九農雖禮官之告止羗千畝之願終載登于門  
于焉以憇侏儒効能乃陳百戲同斯樂于臣民召至和  
于天地爾其三公肅事九卿駿奔庶士御事進趨惟勤



而五推九推之禮於是乎行焉庶民子來喜色忻忻樂  
于趨事荷鍤成雲而終畝之績於是乎成焉羣臣輟耕  
帝心垂眷乃臨齊宮勞之以宴良醞瀉乎黃封大官供  
乎玉膳陳振鷺之萬舞奏鈞天之九變歌在鎬之豈樂  
申既醉之祝願禮成宴罷鳳駕回鑾彌文闕典千古幸  
瞻其盛德大業實所以立生民之命而騰萬姓之歡者也  
若乃黍稷或或豐年穰穰是割是穫乃積乃倉精繫于  
以供粢盛芻藁予以餉犧牛或奉天地之獻享或備宗

廟之烝嘗肆昭假于上下惟降福之皇皇綿子孫于不  
替延聖壽于無疆臣嘗聞之周之立國本之於農后稷  
粒生民以開基公劉篤前烈而繼功文王九一行於岐  
豐武王有藉諸侯朝宗成康繼立越在幼冲方作詩以  
深勅重嗟嗟于臣工駿發爾私噫嘻勉終四夷賓服海  
內時雍藹泰和之盛治致比屋之可封於惟聖朝與周  
方駕列聖相傳一德流化帝初嗣服首務躬稼抑工商  
之末業興農作於櫟耜於戲盛矣哉嗟夫五禮之事惟

祭為大用已力於勤勞薦神明以醢醢固有以昭孝誠  
致明賚矣然而萬民以勸稼穡是親棄末反本法于一  
人則田無閒曠之地國無遊惰之民帛芟芟以在笥粟  
陳陳而相因由是衣食之計足廉恥之心生風俗由之  
而歸厚禮義于焉而聿興會極歸極蕩蕩平平民日懷  
於遠法治益臻于措刑若乃叶氣融液蒸為休祥景星  
耀而泰階平玉燭調而卿雲光麒麟遊于郊藪阿閣巢  
乎鳳凰器車在山醴泉可觴則億萬斯年臣有以知皇

圖之固如日升而月恒帝歷之綿同地久而天長者矣  
復系之以辭曰帝乘六龍以御天兮協風回春農祥躔  
兮瞻彼南郊開藉田兮順動法豫時行應乾兮青壇致  
祀舉趾長阡兮耒耜云釋迴旌郊廛兮粢盛有備致孝  
虔兮穡事用勸作黎元兮春生八荒大有年兮化行民  
勤力本專兮俗用丕變道平平兮載芟作頌播詩篇兮  
巍巍赫赫百世其傳兮

炎暑賦內閣試

作噩之歲六月既望余退自公朝假憇玉堂有客從余而登焉余乃喟然歎曰皇天平分四時兮夏隆赫而當陽時生育以長養將既阜而既昌羌振威以肆虐物胥焉而用傷揆薰煊之所由知孰司其崇綱炎帝降兮乘離紛巍巍兮執衡前燭龍使先驅兮後熒惑使從行叶羲和攬轡以雜進兮驂回祿與畢方火旗獵獵以當空兮傘焰焰以高張獨丹鳥彌節而後殿兮白日之彌長使豐隆玄冥屏氣而不得伸兮何飛廉之顛狂飛塵隘

土井泉竭縮鱗卷鬣蛟龍藏沙石兮銷鑠草木兮枯黃  
山延熾焚以凝烟兮水洶湧其如湯盡六合以為爐兮  
豈獨炎乎崑岡委藉乎殷紫無蕪穢之紅芳詬締給以為  
重兮豈天時而不當揮霜紈而脫余腕兮何仁風之可  
揚緬河朔之嘉會兮思解釋乎冠裳拊煩襟而太息兮  
汗汨汨以翻漿晝既蒸炊之如甑兮夜復蚊蚋之在房  
顧何以寧吾軀兮寥余熱乎中腸吾將東浮于滄海兮  
棹溟渤而擊空明叶嗟扶桑為日之出兮更酷烈而無

所藏吾將登崑崙之絕頂兮窮天上之銀潢折玉井之  
蓮葉以為舟兮駕清風于一航恨不得假羽翰於兩腋  
倏忽舉身而西翔顧南溟之可泛兮又瘴毒之非常鳶  
跼跼以下視兮援湊死以流亡吾聞陰山積冰之可鑿  
兮步余馬於北荒何地皮皴烈凍鼠渴鬼方暍死空邊  
疆東西南北皆不可以往兮禹方之廣徒茫茫夫維木  
天之與塏兮寔冠絕乎帝鄉崇垣繚以聳光兮長河繞  
以汪洋比萬乘之武庫兮面萬雉之宮墻花雜樹之百

卉兮槐周植以千章布佳蔭于館閣兮含笑語之微涼  
亶炎暑之去避兮豈康娛而自忘曲肱枕以高卧兮渺  
夢揖乎羲皇顧此之可樂兮又何必遠遁而奔忙快矣  
哉客之適兮又孰知余樂之未央客起而正色曰是非  
余之所知也夫陽極而暑炎矣皇天道之孔昭故曰萬  
物並生於天地豈余身之獨遭任寒暑之自然兮成歲  
功而不勞

歐陽公  
暑賦

而子亦物耳胡病此而嘐嘐且天下

食力者衆豈盡閒逸如吾曹彼菑畬之田父兮冒烈日



之熬熬挽泉流以下灌兮聲密連乎桔槔手耒耜而戴  
笠兮肆蔗蓁以立苗幾垂氣而不蘇兮又奚啻爆煇而  
灼龔或牽牛以服賈兮睠征途之迢迢既灰壤之若燎  
兮又逆旅之無聊方駕言以行邁兮曾不計夫銷骨而流  
膏若乃邊關戍卒稱干立旄夕枕藉乎金革兮朝並驅  
乎兩犄想敵夫王之愾兮而擬絕乎天驕日擾擾而不  
得息兮徒哀鳴以謦謦嗟露處之鬱蒸兮益心曲之如  
燒彼秉忠以圖報兮雖炎暑其亦何逃予徒食祿亦何

補兮重清職之道遙舍民困之弗恤兮而欲據此以自  
豪余肅然而興愕然而駭顧無詞于復客乃作歌以自  
解歌曰維時長夏兮極炎暑人之靡寧兮汗如雨嗟余  
鬱鬱兮困不蘇仰捫皇天兮獨號呼南薰一奏兮發幽  
韻阜民之財兮解民愠天心聿昭兮聖躬勞四輔弼成  
兮勤燮調亢陽隱伏兮鮮飈鼓清音均溥兮遍寰宇功  
及物兮祥氛清陰陽循環兮以常行余竊職以何為兮  
惟詠歌乎昇平

辭

望雪辭

內閣試題

夫何玄冥雨雪之愆期兮，羌有失於天職。雲何為兮，不  
同霰何為兮，不集悵仰天而馳望。極余懷之鬱悵，風不  
凜兮，淒其氣不嚴兮。烈栗何顓頊之不廉兮，奪彼陽春  
之煦日。煦日兮融融，念匪春兮。伊冬，瞻連雲兮，宿麥及  
在地之遺蠡。苟一雪兮，有靳曷由致兮。年豐年不順成  
兮，曷怙札瘥多兮。沴氣布步，璿衡以推測求蒼天之何

故天漠漠兮莽無垠目渺渺兮徒傷神嗟三農之渴想  
何滕六之不仁冬之日兮苦短節序邁兮非緩恨不得  
起逝波于銀潢煩此天孫之一剪天與民兮情自符德  
潛感兮非我誣况歲臘兮尚遠更聖皇之馭圖將天心兮  
上格驅豐隆兮命風伯霏繽紛兮素英大雪降兮三白  
跂予兮望之盡六合兮登春熙承上天之嘉惠皆吾皇  
之恩私

白雲辭

寅友謝先生鳴治謂余曰鄉人趙廷時讀書  
好古善吟咏居樂清海濱其地曰花塢花塢  
之山自雁山延迤而至海岸東行杳然如入  
無人之境因扁其居曰白雲深處且稱其頗  
好知音非草草者要余為白雲之辭以發其  
山中之趣遂為之作短辭三疊填其卷尾云  
白雲兮英英渺雁山兮深谷顧縈紆兮芳林  
忽舒徐兮前麓聊棲遲兮終歲何高軒兮華  
屋列圖書兮壺觴日

吟嘯兮相屬  
寒山中兮樂只望美人兮幽獨

白雲兮悠悠  
睠花塢兮少留時  
逍遙兮採芝  
羌窈窕兮經丘  
獨行無友兮吾將安求出  
與雲俱兮歸與雲游  
鳥交交兮鹿呦呦  
原可田兮水可以舟  
寒山中兮樂只望美人兮獨幽

白雲兮翩翩  
海之湄兮山之巔  
煮溪中兮白石酌屋上  
兮清泉嗟清時兮嘉遯  
信夫君兮獨賢  
紛華俗兮起忽維  
白雲兮周旋  
寒山中兮樂只望美人兮悠然

忠愛廟迎送神曲

福汀忠愛廟在郡東龍山之麓祀故推官謝  
侯汀以正統己巳有寇賊之擾侯極力捍禦  
又原其脅從者縱遣之因卒于軍中民思其  
德為請于朝立廟祀之其子翰林學士大韶  
求詩以祀為作迎送神曲

南風來兮汀水波蒼龍伏兮鬱嵯峨簫鼓喧兮廟門啓  
伺吾侯兮山之阿孔蓋張兮振翠珂旌旆還兮軒從都

侯治汀兮政不頗犴狴清兮布陽和汀民擾兮侯荷戈  
活汀民兮侯功多報功有祀兮頌德有歌願終惠兮永矢  
弗他

青山隱兮龍欲翔汀谿澄兮南風涼幸侯至兮設侯床  
蕙穀蒸兮薦椒漿侯神遊兮橫八荒民德侯兮何時忘  
侯之生兮嶽降祥享汀祀兮紛洋洋侯有子兮步玉堂  
握文魁兮挾天章侯之來兮時雨暘侯之去兮降福穰  
雲駟遠兮不可望願終惠兮傳無疆



瀛洲別意送賓之

賓之既得請南歸諸友咸出租東郊而惜別  
之意形之詩聲者甚富余不揣聊述短詞歌  
以侑觴深愧其辭之拙也

春風起兮潞水瀾瀾蘭棹發兮揚桂旗悵美人兮懷歸  
往送之兮水之湄雲娟娟兮連延柳嫋嫋兮薦綿望美  
人兮高翔策余馬兮空還君山兮青青下中流兮泝洞  
庭君歸來兮故國撫楸梧兮嬰情我思君兮悠悠閭闔

開兮倚清秋承后皇兮嘉惠君之來兮不可以淹留

樂府

中秋大雨無月作嫦娥怨時會陳師召宅

憶自奔歸月宮裏來往東西若流水崖前丹桂千度花  
海底魚龍幾回死年年獨守廣寒宮玉殿瓊樓相映空  
美人悠悠懷永夕孤影眇眇臨悲風泣血號天目欲瞽  
豐隆礫雲送寒雨淨洗鉛華入素秋始覺孀居心轉苦  
瑣窓聽雨度寒宵擬藉芳樽酬寂寥空慚偷得長生藥

此日清魂誰為招

元宵會吳鼎儀宅分得將進酒

將進酒黃金盃東風搖蕩春歲蕤清宵對此燈燭輝明  
月皎皎當中閨將進酒夜未央日月逝矣嗟流光年時  
感此雨雪狂美景不及今晨良將進酒一再行醉來爾  
汝俱忘形交分藹若弟與兄豈直傾蓋論平生將進酒  
伐木詩倚歌而和心孔夷我雖不飲強倒卮永懷白首  
同襟期將進酒君莫辭

五言古詩

題竹石

湘江不可渡披圖開我心萬玉倚晴碧彷彿湘山陰清  
商聳毛髮蒼雪何蕭森霜寒白石瘦林迥青烟深危梢  
拂層巘遠黛迷孤岑泠泠發天籟悠悠引鸞音幽貞良  
足娛密蔭還相臨懷哉冰雪沍挺挺紛難侵佳境渺在  
望何當遂招尋臨風意無限因之感微吟

晴簷鬪鵲

晴日煦而麗脩簷下輕風維鵲肆搏擊上下虛庭中奮  
然各賈勇喧啾若爭雄一或寂垂翅奔敗潛無踪一或  
奮翼起氣勢摩蒼穹得失果何在角力徒自憊微物尚  
知競人心將焉窮覽之增餘悲回首雲天空

題蘭四首寄浦城故人潘醫學廷瑞

猗蘭在空谷蕭蕭汎幽香白石與偕處翠篠時在傍寂  
寞意不失塵俗已相忘但惜無人知徒然負孤芳

猗蘭在空谷幽人時採之采之結為佩將以遺所思楚

水有餘波湘纍有深辭孤貞諒自保白首以為期

猗蘭在空谷托根官以深羣然伍衆草水石自蕭森宣  
尼既云遠千載無知音臨風發長嘯聊以動微吟

猗蘭在空谷歲蕤粲玉芳對此懷故人眇然天一方安  
得遠相過擊枹下沉湘歲寒結深契遺余雙鳴璫

上已會尚質宅時雨雪交集得日子

四時有更謝逝者一已疾冉冉暮春至和風轉陽律感  
子共寮案歡會聊暇日宿雨朝未休途潦莽四溢躊躇

立前庭恐茲節序失駕言策駕馬西瞻子雲室高樓殿  
雲漢良朋三與七逍遙綜壺奕談笑散書帙勝負誰為  
謀詎諧不可詰舉爵長簷下移榻更促膝酒酣氣益雄  
憑闌撫吟筆西山涵暮景峰嶂眇蒼翠東園桃李花繁  
華互蒙密四顧盪心胸默默意已悉山陰極清賞遠駕  
亦超軼幽鳥林外歸新月雲間出頽然忽復醉觴咏信  
非一攜手各辭去娛樂難具述顧茲交分情豈云甘縱  
逸朝陽倚桐樹可以成琴瑟苟無樸斲勞終為負嘉質

人生俯仰間飄忽等郵駟緬懷用世心劬勞那足恤但惜千載前古道有穀率壯志共相勉老矣徒唧唧

題鮮于困學士遺墨

皇韻久不作史籀亦已塵古學既凋喪古制遂沉湮文繁世愈降作者日維新春蛇復秋蚓萎蕭何足珍有美困學士運筆如有神翰墨盈海內聲華重儒紳悠悠百年後繼之更何人開卷撫遺跡黯然忽悲辛商敦與周鼎此器誰為陳圖書道如在會見風俗淳



冬至會彭敷五宅詠史分得余忠宣

米田將北轅元祚日以衰豺虎忽遘患江淮遂紛披偉哉青陽公毅然振蕃維孤城扼勅敵白日蔽旌麾小大數百戰征袍血淋漓豈論天道還矢死志靡移援絕城亦陷長號赴清漪妻子及賓客矢心相追隨亦有帳下士隕首甘如飴憶昔勤武備猶能事文詞轅門罷攻守朝夕談書詩遂使忠義心不以喪亂移江水嗚咽流幽魂渺何之至今舒州城獨有忠節祠

答李賓之見寄

結客少年場，詡詡日追逐。如何伐木詩，雅韻竟難續。緬懷金石交，仰止聖賢躅。直諒資麗澤，燕辟承恥辱。所以善道之，詎云惜忠告。吾生已壯齒，沉冥尚幽谷。譬之百疾攻良藥，久未服端居。發深省愴然，抱慚慙。昨感吾子言，一一道衷曲。豈同心背負，甘為手翻覆。膏肓托砭箴，茅塞藉鉏耨。願言堅此盟，吾志當共勗。

愚軒為高都憲

時沈侍御來致意

客從江南來遺我愚公書盛德每韜晦深藏匪中虛知  
巧紛以屏直行恥乖紆永懷心齋人雅志遵聖途默識  
諒亦早允踐乃良圖願起九原下執鞭與為徒寥寥千  
古意此道今何如

輓楊茂都間

神劍出歐冶勁利久超羣歲蕤百寶裝錯落七星文倚  
天發寒采鳴匣祛妖氛一動蛟龍驚再鼓霄漢分往隨  
明主用纍纍建奇勛一朝隨變化高飛入青雲遂令千

載下獨有名相聞長歌撫遺迹佇立悲斜曛神物渺何  
許嗟哉楊將軍

效古意一首與王遜之秀才謝答誨言兼致別  
意

故人北方來贈我錦繡段繚繞芝蘭光蕤葳華采爛豈  
獨佩服佳亦足奉娛玩我欲裁為裳衣冠並輝煥跼蹐  
下刀尺割裂畏譏彈藉以紫雲綃置之青玉案珍重不  
敢狎日夕起深憚感此無以報執別倚增歎高情託金

石雅誼薄雲漢所以十年心不假一詞贊征車難久留  
搏沙聚而散忠告日已疏叢責詎能逭及時期努力敢  
以汙清貫臨歧意無窮引領令人惋

警菴

聖警日以新賢警日以省動警泛應時靜警獨知境好  
惡警沉溺取予警偏秉言行警而飭衣冠警斯整人生  
貴警厲弗警欲易逞詎云警其外能警心迺靖惟修知  
警者箴警心耿耿我勒警菴銘朝夕眎為警

送劉都閫景昌西征

桓桓羆虎羣見此劉將軍敢戰衆莫敵  
勇力時所聞從征二十載巍然樹高勲  
腰間千金劍手中七星文摩挲冰雪寒  
揮攢日月昏携之向西極願言靜妖氛  
遠涉青海波近躡玉關雲壯遊方在茲  
破敵何足云

古意一首送曲阜三氏學錄公璜赴任

客從孔林來遺我楷木杖雲文紆欲騰  
虬髯迄相向重是聖門物操執不敢放  
平生藉扶持履險若夷曠我聞

植根地枝葉紛以暢磅礴千載餘挺拔層霄上小用豈  
其宜斤斧來俗匠疇能事栽培但恐日凋喪成材古云  
難珍護夙所尚懷哉孔公璜道遠不及訪微言願有託  
臨風重悵悵

和傳曰川止酒

止酒之章深愜鄙懷不獨仰知吾兄自重之  
意而愚子亦得以奉為明戒其益非淺淺矣  
第恐不能以卒止其亦止其太甚可乎用是

次韻二章一以導吾兄之飲一以戒不肖之  
飲高明諒之

淵明性嗜酒未必因詩止傳君病痰熱乃在深冬裏酒  
豈為君患自責固君子昨過高坡寓已報勿藥喜東風  
暢春和正及病新起卷冊未忘倦尊罍尚可理苟非沉  
湎失數酌亦由已醒然坐終日於君亦迂矣朝下北門  
直竚望西江溪客中且為樂誰能閱千祀

流水本無窮遇坎亦須止人非江海量獨事深杯裏昨



奉止酒詩雅意謝吾子麗澤久相資新惠尤可喜麴蘖  
豈佳味百疾所由起調攝偶違和累七未能理君懲覆  
車餘惓惓惟悔已我感同心言箴戒亦明矣無為嗜觴  
酌泛濫無涯涘酒經有明訓百拜惟賓祀

雲松高隱圖為清江鄒彥和賦

青松鬱成林上與浮雲連雲來松漠漠雲去松娟娟苓  
珀下深固雨露通重玄兩意忽有合相託成千年不謂  
雲松交轉增丘壑妍清江有幽士志隱耽林泉巢雲卧

松頂手拂青山巔芳陰日已遠雅操日已堅空對高隱  
圖載賦雲松篇

題鮑栗之同知江山無際卷

渺渺天東南中與一線侔上出岷峨根下合瀛海流乾  
坤幾今古日月爭沉浮沆漭巫峽春汨沒匡廬秋金山  
有遺刹漢陽多高樓平生丈夫志雅慕子長遊披圖興  
無際擬泝青谿舟遲回不可往望望雙飛鷗

蘇武牧羊圖為劉閣老祐之

子卿重遠使武皇侈邊功如何常勝徒竊構單于中身  
拘志弗移抱節甘長終牧羝豈望乳聊以安其窮迢迢  
北海上終見南飛鴻廿年歸絕域千古憐孤忠麒麟耿  
遺像丹青照旻穹翻嗟茂陵樹落日生悲風

讀晦翁詩有感輒次其韻

六月十日晨興盥櫛之暇忽憶人言走筆述  
志疾讀一過為之快然不知識者以為何如  
耳

望望逋仙梅眷眷陶令菊空懷杞人憂寧論賈生哭寸  
心能幾何百事日相觸邂逅豈不嘉覩顏良自辱君恩  
浩難酬身計老始足青雲謝榮途白駒賦空谷乾坤遂  
容與軒冕脫羈束乃知江漢遠亦有冥鴻獨洗垢從索  
瘢疑璞任嗤玉長歌歸去辭詹尹何勞卜

尼山春曉圖為衍聖公題

尼山鬱嵯峨孕靈慨千古深根起西周雄鎮自東魯方  
春生意敷潤澤回厚土朝陽麗層巔烟霞互吞吐林姿

日萬變奇秀不可數豈獨泰岱宗聳特出寰宇雲孫國  
上公雅志紹遐武攬勝入圖畫埜色在庭戶羹墻有至  
念仰止亦堪觀乘間如一登羣峯固應俯

溧陽史侯廟詩

杜陵重戚里壯侯挺人傑溧陽推始封建武仰雄烈嘗  
聞冀青政實與龔黃埒就國奉新命出治遵舊轍功德  
本寬大勲名益昭揭雲仍遠相承簪組遂不絕岳山既  
喬聳洮水亦澄澈尸祝啓祠宇躬袞嚴象設顯惠神有

靈報祀禮無闕迢迢千載餘紀成在碑碣

侯名榮漢外戚之賢封漂

陽侯廟號顯惠子孫在漂陽者甚盛

上巳出遊甕山分得處字

密勿金閨籍逍遙玉堂署承平荷君恩倏忽感時叙夙  
約猶未忘遠遊孰為拒晴日散微暄晨景及初曙共出  
西郭門相尋舊行處物生遂敷榮民居樂繁庶望望出  
林麓迢迢轉湖溆草色迷斷岸山光接孤嶼輕風吹客  
衣閒雲擘晴絮冠裳驚雜遝鷗鳥忽軒翥羸馬行復嘶

野花粲如語前途不可詰幽寺渺何許逢人試借問攬  
轡重延佇隔林見僮僕展席具尊俎懸崖費躋攀佳境  
足依據午橋晉公莊輞川右丞墅烟嵐宿軒窓風雲入  
毫楮覽眺豁心目推敲失盃箸歡呼非放曠觴詠亦容  
與詎云禮法踈聊得江山助清賞殊未酣歸興一已遽  
白日不可留青春漸將去懷哉望三益憮然增百慮豈  
不惜燕樂神交媿雞黍願言結同心勉旃永終譽

擬上乞休之疏復疊前韻

伏伺恩命未下益用悚然疏稿既成遂復著  
筆用識鄙懷而已

穠華逞桃李孤芳笑蘭菊剖心誰與明則足空自哭愁  
夢積雨驚望眼浮雲觸已判百念冷寧遣一身辱媚時  
非所能守已聊亦足行藏固由天進退詎云谷薄田猶  
可畊大帶那須束遐哉謝交游允矣樂幽獨絕絃韜我  
琴韞櫝全吾玉擬辦季鷹舟豈待巫咸卜

答王署交情四首



體齋東山西涯三同年以舊日同預吉士之  
選交誼深篤乃各賦古詩四章以贈題曰王  
署交情遣人遞于舟中予感其意亦賦四章  
以復遂因旱弟別歸以寄時五月望日雨中  
也

青雲三十年追隨鵷鷺行葭玉夙相倚永記金蘭芳知  
心志自合同道非殊方獨愧頑鈍質幸不忝冠裳家學  
不可負友誼不可忘龜勉效時用直道古所臧

讀書貴知道處公必忘私苟焉惟身圖君子恒賤之居  
然廊廟尊榮祿復如斯豈不念瓦合媿將奚為夙承  
切磋益日夕事箴規植已苟無媿去住亦隨時

迢迢城東餞孤亭臨水雲知心二三友惆悵惜離羣詩  
長不忍讀酒美難成醺念茲交已久感茲意何勤麗澤  
日已遠誨言寧復聞繼今尚有贈吾方望諸君

朝霞結浮陰輕風送疎雨扁舟沂安流颯爽不知暑推  
蓬坐清曉展轉思延佇夙荷聖皇恩冥鴻遂高舉渺然

江湖心耿耿方自許懷哉眷念情因之寄斯語

喜雨和沈司空時易二十韻

時方約出遊以禱雨而止故詩云然

經春苦炎旱終日厭埃壘林幽空啼鳩池涸絕吠蛤連  
簷勢如焚曲突計欲燬羣趨舞雩禱三謁玄元榻天心  
始矜蠻雲影互開闔精誠諒無間惠澤欣有答初為細  
雨霏漸作濃陰合廉纖徧長原淅瀝鳴虛閣潤色回柱  
礎爽思動巾匱詩興已謝沈酒狂尚輸蓋擬續郊野遊  
稍遠城市雜平蕪翳荒臺翁木蔭孤塔農畝生意數僧

舍清香匝飄洒惜新卷沾濕愧破衲芳茵坐堪藉落英  
行可踏古井暗泉沸高榭輕風颯樂事豈汗漫詞華方  
馭還將車夙所期折簡明須拉駐景亟揮戈秉燭頻銷  
蠟往聞桃李園應費謫仙榼

銅瓶行和答少司空沈時易

谿臨千丈流下有百尺泥銅瓶偶墜此至寶中道遺思  
之弗能置朝夕顰雙眉洗濯忽在手把玩不忍離汲深  
固有用履險真如夷神物豈終失笑歌欲忘飢行當薦

清廟永結千載期

青谿漫稿卷一

欽定四庫全書

青谿漫稿卷二

明倪岳撰

七言古詩

墨梅

歲華欲宴嚴冰霜山林萬木皆摧傷  
天意獨爾儲孤芳根柯屈鐵何堅剛  
冰花競發先春陽傲睨六雪紛迴翔  
珠璣錯落生夜光天風習習飄清香  
姑射仙人整靚粧

鉛華淨洗曳素裳江妃緩步鳴珮璫縞袂輕舉聲鏗鏘  
翠禽飛來月色涼玉笛吹斷空徬徨舉柁澆我鐵石腸  
浩歌一曲天茫茫

蘆雁

秋霖初霽水滿湖西風颯颯吹黃蘆垂楊嫋嫋葉已枯  
沿堤尚帶烟模糊沙洲薄暮多黍菰畢羅之患應絕無  
隨陽有鳥羣相呼食兮宿兮真足娛

謝惠菊



八月秋高天宇清  
東籬菊綻黃金英  
感君惠我紛數莖  
根連宿土何敷榮  
為愛晚節風霜更  
妍華不肯青春爭  
閒來移植臨軒楹  
晴窓對坐逸興生  
有時憑闌詩欲成  
幽香馥馥供吟情  
有時歌嘯清樽傾  
佳色粲粲堦前呈  
夕餐落英聞屈平  
古來不獨陶淵明  
何當過我解我醒  
與君同結歲寒盟

題鶴仙為諸鍊師

湘江水深流不竭  
湘山雲間還崑岷  
黃鶴樓頭鐵笛聲

一聲吹落長空月主人獨倚闌干望仰見一鶴西南翔  
上有仙人醉不醒也知倒盡瑤池觴瑤池宴罷日色晚  
跨鶴歸來不知遠霞裾行逐天風長放浪人間會須返  
相逢相別君莫愁遲當携爾登瀛洲攬衣上鶴復飛去  
但見湘山寂寂江悠悠

赤壁圖歌

武昌東來古赤壁摩空斷岸涵清秋下有長江一萬頃  
朝宗到海無回流曹瞞昔此振戎旅虎視吳會期全收

舳艫千里付烟燼未必黃蓋多奇謀從來勝負非人力  
自是東風惟便周坡仙豪放久無匹明時左謫來黃州  
遠尋赤壁極清賞夜棹一葉之扁舟匏尊獨與二客共  
迎波擊漿還夷猶共指遺蹤弔千古山川鬱鬱如含羞  
沉沙折戟自銷滅霸業荒涼土一丘異代興亡已飄忽  
寓形宇內真蜉蝣浮生過眼倏萬變人苦不樂將何求  
洞簫吹殘江月小扣舷歌罷聲啾啾霜葉飛紅暮烟紫  
潛蛟起舞嬌姬愁欲挾飛仙不可得但覺兩腋風颭颭

臨臯歸來從雪堂斗酒鱸魚追舊遊酒酣就睡客已去  
老鶴一聲魂夢幽回首那堪復陳迹惟有二賦人間留  
玉堂退食見圖畫飄然使我懷前修招黃鶴兮乘翠蚪  
憑虛浩浩凌斗牛吁嗟風景賦中識欲繼茲賞知誰儔  
閒來翹首騁長望乾坤蒼莽東南浮嗚呼坡仙去矣不  
可作江流無盡長悠悠

夢仙吟

羅明仲夢中得碧潭夜浸  
珊瑚冷之句因足成之

我昔夢到蓬萊宮三山對峙滄海東玉樓十二接天上

地位不與塵寰通蕭蕭亦有綠髮者羣居豈獨黃眉翁  
我揖仙翁問寶訣喜我骨相非凡庸招我驂鸞跨白鶴  
神遊八極乘長風飄飄雙袖凌雲起霞裾星佩聲琤琮  
振羽扶桑脩萬里凌絕倒影衝鴻濛才經弱水已瑯島  
忽歷太華仍崆峒人間雖有八駿足奔騰何處追竒蹤  
興倦歸來動觴酌落日送盡西山紅仙城迢迢拂衣入  
繡褥坐我青芙蓉紅蓮萬炬光奪目雲窻霧閣相玲瓏  
金光分遺萬年草沆瀣瀉落琉璃鍾冰盤異饌雜麟脯

琅璈雅樂卑絲桐謂我飯我絕佳味斫鱠欲取靈鼈供  
舟人深入破烟水漁竿一掣驚蛟龍碧潭夜浸珊瑚冷  
銀絲削出鱗甲空酒酣大嚼發真趣竦身長嘯聲如鐘  
耳邊授我鍊藥說還丹有術輕叅同崑崙瑤樹亦可折  
何必遠遊尋赤松我拜仙翁謝嘉惠誓將脫屣長相從  
鄰雞喔喔忽驚覺滿庭落葉霜華濃起望瀛洲不可見  
悵然極目孤飛鴻

輓棠谿處士肅菴江先生

子純同年進士

誅茅結屋臨棠谿，閉戶讀書人未知。  
雄才不復為世用，致君有術嗟無時。  
壯志空然成白首，獨與棠谿作賓友。  
有酒可酌詩可吟，脫落煩羈肯輕受。  
神遊何處招不還，西風薤露歌聲殘。  
魂去棠谿谿月白，魂返棠谿谿水寒。  
廿年葬骨黃甘道，隴樹淒迷多宿草。  
青雲不負舊衣冠，白面孤兒致身早。  
我歌為君重慘神，古來豪傑多沉淪。  
埋光鏟采老丘壑，千載悠悠知幾人。

春閨怨

憶妾與君初見時  
烏雲挽髻橫娥眉  
嬋娟恩義兩相得  
偕老有願天應知  
年來何事輕離別  
君向江南妾江北  
夢魂常逐暮雲飛  
音書久與秋鴻絕  
清明三月見春殘  
深閨猶自怯春寒  
臨粧漸覺鉛華改  
閉戶誰憐花鳥闌  
脉脉愁來心欲死  
空向春風怨羅綺  
沉沉簾幙易黃昏  
月光獨照紗窓裏  
年年見月缺復圓  
獨怨夫君去不還  
尋君欲抱琵琶去  
一曲相思和淚彈

題湖山雨意圖

五月廿日題時久無雨



湖雲欲雨濕不飛千山萬山烟霧迷翻崖擁壑忽已暝  
白日半沒青天低模糊亂壓雲夢澤掩映乾坤漸昏黑  
浦溆爭投漁子舟嵐光淨鎖幽人宅雷輶電走風更豪  
彷彿捲去簷頭茅幽人驚起不敢睡耳邊但覺蒼龍號  
蒼龍變化鼓餘勇瞥起直上驚洶涌山木微茫猿狖啼  
虹霓明滅蛟鼉恐霹靂列缺乘雲來連峰峭壁皆崩摧  
青冥浩蕩不可測沉沉一鏡當中開魚蝦帶去半空落  
水天頃刻皆回薄勢凌五嶽自崢嶸忽轉孤巖已冥寞

影響奔騰雨意深須臾過眼氣蕭森定知四海沾濡意  
足慰三農渴望心祇今炎炎苦天旱退食披圖發長嘆  
誰解為霖振槁枯空對遺編讀雲漢

晚泊魏家灣

月夕大風有盜賊之驚  
舟中戒嚴至旦乃解

魏家灣頭水清淺十里長堤柳如綫舟行且止不須牽  
明月已照長堤前狂風俄然動坤軸雪浪雲濤互奔逐  
灣頭有客輕遠人彎弓縱矢誇入神滿目荒烟轉愁棘  
鏗鉤金鼓傳呼急共判相與坐天明已喜平安及曉晴

人生得失豈足計  
奈此驚憂非客意  
恨不乘風一夜歸  
船頭畫鷁長如飛

古木寒鴉為錫山王敏行

空山古木烟霧迷  
高枝直與浮雲齊  
垂蘿落落綰晴黛  
寒竹蕭蕭含晚淒  
好鳥飛來喜相托  
爭向夕陽深處棲  
風霜不厭老幽谷  
羽翼自可凌秋蜩  
空憐返哺起深思  
正爾月明聞夜啼

題秋江歸棹圖

落日未落懸林梢西風蘆荻秋蕭騷秋江水淺石齒齒  
古堤楊柳凌雲高三老長年何促速百丈牽船過林麓  
布帆無恙晚初收急篙撐向前村宿家住前村深復深  
翩然誰識歸來心脫身風浪老亦足放跡雲山何處尋  
君不見陶潛松菊荒蕪久張翰蓴鱸果何有鄉思方濃  
宦味輕冥鴻一去空翹首此圖不辨陶與張吳淞遠矣  
更柴桑我生竊祿愧無補時望白雲懷故鄉

題胡馬圖

大磧飛沙白於雪北風怒號海冰裂髯胡把控正愁寒  
地上騏驎汗成血騏驎元出洼水中朝刷天河暮崆峒  
飄飄四駿盡龍種風神各異筋骨同紫燕飛兔思騰踏  
走狗蒼鷹氣蕭颯雄姿自足畫圖傳奇材豈與駑駘合  
一匹雖瘦標格存試出還空冀北羣伏櫪誰能保終惠  
行邊猶解策高勛可憐共飽沙場草無由一騁千里道  
天涯霜露莽蕭條祗恐驂騑易衰老髯胡髯胡不敢騎  
好從重譯獻彤墀玉臺閭闔清峻却看黃帕蓋鞍時

三鷺圖

新荷織風翠如剪  
屬玉孤鳴水波卷  
何時舊侶雙飛來  
並逐滄浪弄清淺  
羽雪經春猶未消  
頂絲颺日輕飄飄  
窺魚來往思無限  
高潔不受漁人招  
君不見畫圖彷彿  
差相儼千古長憐魯文子

賀英國張公射捷歌

文皇報功銘太常  
異姓獨數河間王  
上公茅土傳無疆  
矯矯孫子承其芳  
文韜武略衆所臧  
中朝注倚麟鳳祥

先皇召見七寶床尋常雨露沾濡滂我皇繼統御明堂  
熙熙民物歸虞唐豈以盛治忘豫防簡閱戎備心皇皇  
維時四月天艷陽勅開射圃西苑傍黃屋左纛臨中央  
虎賁貔貅侍兩廂旌旗卷雲白日黃金鼓殷地晴雷鏜  
諸侯劍佩紛以踰裝束繡帽雲錦裳雕弓韞服矢插房  
拱翼趨進仍雁行惟公年少思奮攘况復第一爵序當  
揮鞭縱轡意氣揚蹴踏神駿驚高驤瞥若掣電流晶光  
手中白羽鳴秋霜參連破的相鏗鏘飛鳥退伏兔走藏

應弦落殼非蹶張却笑一箭空穿楊衆目愕顧風回颺  
懽呼振耳聲洋洋後來繼者誰頡頏鵬鷖斥鷃難為翔  
天顏有喜寵命將勞宴特賜流霞觴更有寶鏹來上方  
明日恩詔傳貂璫內帑蕃錫禮數章黃金腰帶蟠龍香  
擎出里巷增輝煌受之百拜喜欲狂眼前紈綺惟膏粱  
惟公令望如圭璋巧力小試詎足量胸藏甲兵十萬強  
風雲千載逢明良天生老將登巖廊隱然與時為津梁  
威名震懾戎與羌天山大定四海康由基仁貴何足長



我歌雖短意則詳慶源已擬後寢昌河間之水通天潢  
千秋萬歲同湯湯

御隄烟柳

東風二月千門曉紫禁暄妍暖雲繞玉河隄畔赤欄橋  
高柳依依得春早柔條裊娜百尺垂蘸水點破青玻璃  
晴烟一抹鎖深碧曉色正與春相宜暖風忽聽黃鸝轉  
入望模糊迷近遠鮫綃帳薄疑未收翡翠簾輕不堪捲  
日高忽覺散浮陰無限韶華連上林紛紛萬卉足生意

自是皇家雨露深

喜雨詩

都門二月東風早布穀聲聲弄清曉農作將興土脉融  
田翁屈指春多少黃塵飛揚白晝昏暖日漸烈天無雲  
商巖何人慰渴望為我一洗枯槁根兀坐書齋深歎息  
忽聽新雷起西極霖霖微施造化權空濛已謝沾濡力  
起來細數簷頭聲隨風潤物如有情東郊多稼足生意  
上林芳樹抽繁榮萬彙生成藉時雨優渥今看遽如許

擊節長歌雲漢詩  
閑雨憂勤荷明主

田家喜雨歌

韶華蕩漾三月天  
綠楊枝上噓晴烟  
田家望雨心正渴  
鳴鳩數聲風颯然  
墨雲低覆塍頭樹  
好雨彌空下如注  
潤物潛看霖霖流  
及時溥謝甘霖布  
宿麥芄芃穗漸黃  
新荷簌簌初抽秧  
總為朝來一犁足  
坐令終歲成豐穰  
豐穰有兆懽聲作  
擊壤長歌物咸若  
四海均沾造化功  
題詩為紀田家樂

冬雨嘆

近山茫茫遠山黑萬里乾坤同一色  
窓前亂脚雨如麻  
窓裏孤踪淚成血歲云暮矣三日雪  
冰凝初晴地猶裂  
不堪兩日雨經宵一點一聲心寸折  
新墳已築高嵯峨  
舊墳猶作荒坡陀長鏡欲出泥沒脛  
對此踟躕將奈何  
青松初長三尺過買栽遠自南山阿  
一時委積不復數  
廚奴失喜炊薪多年來苦恨窮愁續  
把卷煢然不能讀  
寒燈冷雨愁轉長忍聽東鄰夜深哭  
曉起鄰翁來致辭

丈人雖苦何足知誰家葬母水盈坎臘月庚申從葬師  
已亥十二月予宿墓所躬築先曾祖以下諸塚魚手  
植松檜百餘本於墓道之旁兩日為雨所阻既不敢  
登壠又小樹移自遠地生意蕭然坐成愁嘆忽有工  
人來云此庚申日也葬者甚衆苦於冒雨幾弗克襄  
事且嘆慕先君之盛福云予因憶向亦幾用此日幸  
不為葬師所誤語畢漫記於此

雙鳳行壽李裕之秀才父母

金烏刷羽扶桑曉，蜃閣龍樓海天杳。眼中指點望蓬萊，  
波心一點青山小。蓬萊壽翁鬚髮蒼，霞裾獨速搖瑤璫。  
手持雲笈控朱鶴，來訪李耳長生堂。為言仙李蟠根久，  
丹實輪囷大於斗。上有高巢雙鳳凰，相對如賓復如友。  
老雄文采光陸離，朝陽噦噦呼其雌。並飲瑤池飽玉液，  
聯步瑤階餐玉芝。莫道春流綠如剪，已見蓬萊水清淺。  
莫道蟠桃幾度花，不把繁華掛雙眼。閒來共憇丹山梧，  
夢遊圓嶠仍方壺。逍遙忘却老將至，慰意更有二靈雛。

大雛已負冲霄志，覽德將為太平瑞。小雛羽翼亦已成，  
相逐相隨閱清世。壽翁語罷呼麴生，冰絃醉弄南薰聲。  
夜涼如洗不知暑，寶婺正映弧南明。忽傳翁姥佳期共，  
泥槭擬致長生頌。仙輶望盡鶴飛遙，聊向尊前咏雙鳳。

喜雨謠

辛丑之歲，自春徂夏，亢陽不雨，流河不通，水  
脉幾絕。農事弗修，漕綱且沮。遍禱羣祀，天意  
弗答。乃五月九日癸未，始雨達旦未止也。喜

而忘寐因效里謠一章

寒芒萬丈飛天鋒東西交射層霄中

歲暮十二月廿二日夜有天鋒見十

數

壁火雲盤礴不肯散焰光時作燒天紅

自後恒有火災人皆夜夜防之

六鰲負扇撼坤軸

二月十日地大震

却送江南三月風

一春皆大風

喧豗捲塵蔽白日咫尺浮翳成昏蒙

恒有翳

兩丸黑白互

盪激十日始憐后羿功

三月四月間每有黑氣如丸相盪且多

相逢盡

道水脉涸巢湖有路行人通

人自江北來者云巢湖乾人自湖中行如陸地云

高田低田總如赭踏車不救秧苗空廟堂祝幣來羣公



紛紛走謁緇黃宮癡童呼天口欲裂天亦不聞如耳聾  
我意天應憫赤子似惡此舉真愚庸片雲不生暑威熾  
嗟我絕望心力窮五月九日水羊舞忽然雨脚來濛濛  
夜深蕭颯飛轉急決渠湧壑來神工我知此雨豈人力  
枯槁振起生意融我不願天能雨豆時有雨豆之異誰解作粥  
甦疲瘵我不願天能雨針針時有雨針之異誰解補袞為華蟲但  
欲此雨滂沱足三日叱咤海若鞭蒼龍河流滔滔通萬  
漕田疇拍拍酬三農擬效周詩賦雲漢載仰帝德歌年

豐

戲題素扇短歌

君不見秋空月十二闌干照圓缺金波半瀉落蒼茫欲  
與人間洗炎熱又不見春空雲卷舒重疊成氤氲一片  
飛來不盈把翛然殿閣生微薰匠意經營削寒玉方寸  
機關巧裝束雲青月白指掌間伐盡剡籐猶未足我欲  
揚仁風置之懷袖中乘時致身貴有用乾坤闔闢誰為  
功赤日遲遲駐南陸却憶閭閻苦蒸溽咫尺一動搖引

領望清肅雲有陰月有陰卷舒圓缺皆天心安得春雲  
秋月十萬里盡令四海除煩襟

送劉時雍赴閩藩參政

新柳初黃新水綠兩槳如飛片帆速使君欲發須少留  
聽我離歌寫中曲與君結交二十春重是同年兄弟親  
玉堂退直共書史金闕趨朝聯佩紳我慚迂朽百無用  
君向我曹轉增重白面書生久議兵赭衣將士皆知頌  
指揮籌策功業多一官濡滯如君何閩粵分藩信小試

金緋熒熒皆恩波海道澄清藉賢守亦是同袍舊時友

時同年姜用貞為汀守善捕盜有聲烽烟不試瘴烟銷君往臨之復何有

喜君雅識毫髮精喜君雅操冰霜清獨憐君今別我去  
千里萬里難為情短歌易盡斜陽暮執手踟躕立中路  
男兒壯志輕別離極目青雲渺鷗鷺

分題得西湖送張亞參公實還浙

西湖清湖波萬頃涵空明鳶魚鷗鷺自出沒芙蓉楊柳  
交敷榮豐樂樓前畫船裏散滿豐年絃管聲李相遺功

存六井蘇守新隄直如綆善政應垂千載名豈為遊歌  
樂風景使君清操西湖同使君作宦西湖東十年惠澤  
被民物湖水迢迢寧有窮來朝曾踏湖邊雪歸去重看  
湖上月好挽天河一問津星槎早與西湖別

八月四日五鼓大雷雨達旦感之因題白宗璞

戶部畫龍

八月四日秋始分霹靂忽送千山雲星斗無光天地黑  
須臾雨捲銀河渾似驚神龍起揮霍天矯中霄露頭角

眼光掣電滅復明鼻息轉雷止還作鱗蟲變化龍獨靈  
下上碧落蟠滄瀛有時奮迅雨寰宇坐令四海歌秋成  
我聞秦關旱未已安得甘霖遍千里擬續坡翁起伏龍  
何必吳鱣寫形似

題九馬圖

穆王八駿名天下此馬雄瓌豈其亞渥洼夜墮房星精  
神物應隨牝龍化纖離駉駉少為貴三十六蹄更堪詫  
想當闔闔清曉霓旌隊引鑾和駕朝回初遣脫金羈

呈了曾看覆黃帕天廐深嚴日正長奚官出牧乘閒暇  
晴隄水滿柳陰森芳草蒙茸猶可藉長嘶深浴各有適  
俊骨竒姿本無價祇今承平息邊燧戎壘征鞍不須跨  
長嗟健步何由騁騏驥駑駘等衰謝王良伯樂會有合  
足下風雲生叱咤追電終輕萬里程直歷蓬瀛蹴嵩華

送憲友趙景芳以鄉進士出宰商河

君不見鸞刀出冶新發硎鋒芒揮霍孰敢嬰庖丁購得  
寶如玉十牛一日無完形又不見輕車載輦初發軔駿

馬翩翾駕雙鞚乘風攬轡隨所之萬里亨途在俄瞬趙  
君夙負冰玉姿凌雲早折蟾宮枝尋常不遇若有待四  
十作宰元非遲牛刀小試君休惜一段堅剛在操執剖  
決何妨及隱微肯綮仍期剗繁劇名駒伏軾歷太行欲  
行未行猶自傷一朝推轂伯樂手却看馳騁趨康莊遠  
到從今亦何有明日商河獨翹首驅車在道劍橫腰且  
醉都門一尊酒

題胡騎縱獵圖四首



清霜落盡塞草黃驚飛山鵲東南翔飄然棲息自有適  
海天一色秋茫茫紫袍白馬者誰子玉鞭半綰青絲韁  
自遠望之重太息雖有矰繳安能將

黃沙漠漠吹西風高原草樹交深叢嗟哉狡兔自三窟  
失身何處潛其蹤獵人手挽明月弓追逐更騁胡青驄  
眼中得喪君莫訝歸來欲慰君庖充

野濶天空雲影孤白沙淺水經霜枯聯翩何處起雙雁  
稻粱謀遠思江湖忽然見此蚪髯胡雕弓滿控金僕姑

何當健翮快高舉莫遣朔風吹綠蕪

胡兒匹馬明玄霜臂鞬正立孤鷹蒼舉頭雙影夕陽外  
野鴨相呼雲水鄉蒼鷹欲奮鴨驚逝披圖不覺增慨慷  
天生萬物貴得所同類相殘徒自傷

題唐子華枯木為曰川學士

傳君好畫欲成癖長縑巨軸堆滿家江南鍾沈動連幅  
更有吳興唐子華子華筆力獨蒼古參天老木紛如麻  
雲中蛟龍怒且攫海底珊瑚歌復斜大者時間撼風雨

小者恍若迷烟霞柔柯蔽空積蒼翠老幹礙日爭槎牙  
根蟠怪石起突兀谿流斗谷隨低窪初疑三軍罷遠獵  
旌旄十里猶毳氍又疑八月渡河漢彷彿博望初迴槎  
吳興公子墨妙者往往落筆人驚誇松雪齋中脫見此  
亦且退避相咨嗟蕭條異代感陳迹至寶鄭重誰能加  
還君此卷掛君壁一掃凡品真塗鴉

雨中題徐州蘇指揮湘江暮雨竹

孤舟夜聽蕭蕭雨兩岸垂楊翠如許恍訝湘江暮雨中

只欠鉤輈鷓鴣語舡舳偶爾披新圖長汀短渚相縈紆  
琅玕一望渺無際淋漓尚覺烟模糊高者凌空鳳將起  
下者垂垂采鸞尾更憶湘君過九疑羽葆參差亂雲裏  
明朝放棹徐州洪不須局促仍推蓬赤壁江中地遠近  
問訊彭城蘇長公

題白紙扇

缺月飛從東海來吳刀斫破冰蟾胎寒光迸人不敢近  
星斗錯落雲中開老夫拾得不盈把一夜涼風滿天下

成化辛卯六月苦雨決旬民以大困感今懷昨  
良用惻然因抵掌放歌聊以泄激烈之悲耳  
詩云乎哉

去年六月足霖雨頑雲蔽天長不收官衢水淖車馬絕  
野樹巢空魚鼈遊直沽南北混海道畿甸遠邇同川流  
秋來百錢一斗粟民飢更著寒無裘昨日已鬻乳下兒  
今日又殺田中牛嗷嗷僅博一飽耳轉眼亦復填深溝  
鬱塞那堪沴仍作北邙棄骨成高丘掩骼埋胔有遺令

嗟嗟守牧誰為謀乘輶賑貸出旁午宵旰乃爾勞宸猷  
即今皇皇民稍蘇麥已秀實禾欲抽上下鼓舞望豐稔  
飽暖已判歌有秋如何六月雨不止連綿恐欲傷田疇  
豈但羣蛾蠹麥穗亦復有耳生禾頭奔馳徒費雨師力  
淋漓不解農夫憂早寒暮熱人重困兒童往往成悲謳  
端居對食不下咽天意豈與斯民仇奸人猾吏試一殛  
亦足以見天所尤何須連年病赤子疋贏尙儻誰當瘳  
我願天公放白日照耀四海祛煩愁蠶得帛兮田得粟

樂以卒歲心悠悠小臣無能竊君祿却把大筆歌天休  
時有早寒晚熱人死至七八月之謠

傳曰川曰會雁行待漏像圖限韻短歌

君家兄弟知名早渝川地靈到今好才看連壁產荆山  
又聞雙鳳鳴周鎬金榜策名次第書彤墀峻級逡巡造  
伯也久繫翰苑銜季兮仍占中書考褒鄂空傳侈舊圖  
軾轍誰傳入新草不用麒麟列高閣總謂驂駟在馳道  
點滌丘壑意轉妍脫落山林迹俱掃更喜閒官共儒素

亦幸清時際熙皞聯珮同趨曉漏遲揮毫直對朝陽杲  
螭頭晴雲明象服雉尾香烟瞻翠葆百年華萼相光輝  
千載詩書互探討英標傑峙衡霍峻勁氣雄翻江漢浩  
錦繡盤旋五色腸珠璣錯落三軍纛文采差差已外弼  
華腴煜煜仍中抱當年殷鼎重鹽梅今日舜衣資大藻  
從來特行乃國琛孰若二難為世寶久知芝蘭合競秀  
亦許松柏宜同老青雲有路已連升白首無渝矢相保

陳汝玉安江樓詩次沈時易司空韻




長江如塹護天府十萬水軍盡羆虎樓船自有壁壘固  
鯨鰐總無窟穴阻高皇開基親定亂列聖繼圖猶重武  
昨日中丞猶奉詔到處先驅爭負弩已聞號令隨玉節  
便訝風威生繡斧帳前戈甲喜森森座上衣冠驚楚楚  
舊操戰艦控中流新建危樓當水滸帆檣賔爾出霄漢  
波浪恬然靜風雨祗緣彈壓息烽燧却任喧闐動簫鼓  
范老元知富甲兵謝公豈謂耽歌舞還聞什伍精訓練  
亦望尋常詢疾苦入朝有日期大拜留取清風繼房杜

送楊應寧赴南京太常

去年曾醉回仙衙  
禮寺幽閒多名花  
北來忽此春欲暮  
顛風滿目惟塵沙  
始知良會不易得  
漫爾逢人時歎嗟  
楊君別我去南省  
占此佳勝樂亦賒  
君家京口本隣壤  
丹陽郭外人將車  
金陵佳麗古所重  
聖祖創業今京華  
奉常清卿縉紳表  
詞苑相承俱大家  
多君文采繼芳躅  
斯地因人尤可嘉  
鍾山秀色在庭戶  
日高方始聞朝鴉  
品題隨意徧花鳥  
瀟洒豈直凌烟霞  
宦途優游此其寂

口不能語心常誇送君復動故園想敝廬遠市無喧譁  
過門珍重一枉駕青谿咫尺天之涯



青谿漫稿卷二

欽定四庫全書

集部

青谿漫稿卷

三五

詳校官編修<sub>臣</sub>李光棟

中書<sub>臣</sub>劉源溥覆勘

總校官庶吉士<sub>臣</sub>何思鈞

校對官中書<sub>臣</sub>范鰲

謄錄監生<sub>臣</sub>朱錫彤

欽定四庫全書

青谿漫稿卷三

明倪岳撰

五言律詩

贈李都閫士章

玉帳坐生風將軍冠世雄  
雕弓控明月寶劍撫晴空  
笳鼓軍容肅旌旗敵陣空  
清朝有麟閣行見紀元功

中秋明日重會吳鼎儀宅分得光字

昨已中秋過如何更舉觴謾勞頻會合未許太踈狂宦  
路憐同宦鄉心感異鄉明年今夜月誰復共清光

曉發女兒寺

帆開天欲曙星斗尚招搖漸覺村居遠方驚客路遙不  
禁風獵獵相送水迢迢夜泊知何處晴雲隔暮潮

晚泊新口飲章太僕舟中

落日下新口遠帆時見收應判同秉燭相與更移舟海  
內經時別天涯一醉留遲明各分袂去住兩悠悠

過奉新復與章太僕會遂邀飲驛中觀壁間日本  
碧照野釋所題有作

驛舍在河許拂衣聊與登獨憐身似燕共醉酒如澠好  
客金閨彥能詩碧海僧相看成一笑聚散亦難憑

過高郵湖

晴湖三十里杳渺絕雲天漁艇浪中出客帆風外懸經  
遊非偶爾飄泊正依然極目東南道孤村起暮烟

沙河遇便風遂至龍江關



已擬沙渚泊忽來風雨聲人皆催早發我亦厭孤征浪  
駭千峯出舟憐一葉輕此時雖甚捷猶是險中行

挽太僕沈少卿

珪

宦路憐騰踏都來十四年有親驚白髮無子負青氈客  
夢成蕉鹿鄉心逐紙鳶淮陰舊遊處門巷總依然

三月晚泊和合驛

戊戌二月

晚投和合驛地近久知名茅屋孤村斷烟波一棹輕水  
痕沙半折春色柳初榮自信儒官冷無勞候吏迎

送陳師召侍講陞南京太常少卿

載酒都門道春風花滿園永懷別後事須憶醉中言求  
友長憐子居官屢得孫何時尋舊約聯佩掖西垣

九關辭曉仗匹馬逐春帆暫解詞垣直榮題禮寺銜龍  
江天縹緲鳳嶺雨巉巖到處供吟眺何時寄一緘

詞垣二十載友道託深知閩海來雙鳳秦淮見一夔聖  
皇元重禮士子待談詩明日河橋別停雲有所思

行歌動驪駒番直別金馬啣杯復踟躕把袂此傾瀉交

情固同陳文采豈殊賈容臺藉增重江南慕風雅

九日遊陳氏西園即席次鏡川楊學士韻

左掖候朝回西谿共客來陶翁思對菊杜老慰登臺山  
近秋屏列池清晚鏡開似忘紅日墮猶欲盡餘杯  
紅葉明孤嶼黃金媚一川山童供午餉野老刈秋田歸  
鳥高還下閒雲往復旋試看村社日扶醉說豐年

穿巖結疏屋接隴布秋菑出郭路非遠還家心自遲最  
宜春雨後又近夕陽時彷彿青谿曲悠然千里思

酣餘步遠勝暮景自清澄籬菊未堪摘谿魚猶可罾竹  
間挑晚稻荷底拾秋菱欲盡登高興攀崖更一層

草庭都尉西涯學士兩以正月四日同復命奉

天殿有詩紀之輒賦一首

南北馳驅異東西奏對同翻思三載上又是五更中好  
事傳青瑣新編出綵筒如聞雙鳳語翩翩在梧桐

寄和屠元勳都憲巡邊再用韻之作

建節風霜地驚心塞草秋弓刀深警戍鼓角遠鳴樓詩

為籌邊得名因制敵留長城今有託高爵會須酬

荒涼臨絕塞搖落值高秋古鎮山當壘孤城樹映樓  
戍兵深可念驛騎暫須留却憶勞行役清吟誰與酬

五言長律

送陳直夫赴南臺理刑

王署初開講青衿舊執經深林嗟豹隱空谷見蘭馨  
詞俊驚翻峽名成訝震霆聲華金貴重丰采玉晶瑩  
戎幕分繁政親闡慰晚齡天曹俄捧檄秋水遽揚舲  
柱下榮

周史臺端典漢刑東山沾惠雨南斗煥文星遙望天邊  
鵠相看水上萍分携猶繾綣惜別重丁寧椿府移歸棹  
霜堦盡落莫久違憐寂寞獨立歎伶俜目斷遠山隔淚  
俱清露零平安煩兔穎械識託鴻冥落日沙頭酒西風  
驛外亭有懷渾不盡翹首暮雲停

謁孝陵有作用子美昭陵韻

烽烟從盪滌華夏愜依歸海岳趨戎馬星辰上衮衣舜  
文千載治湯武一時威運撫乾坤永明揚日月輝山陵

今宵漠寢殿故霏微螻蟻空瞻拜神龍仰奮飛

臘月二日諸同年會飲予家因作圖以紀終會

云

憶歸鰲禁直愛說杏園圖

時因舉三楊諸先生杏園雅集圖以為之倡

諸老

留遺事中朝仰盛謨文章臻道妙勲烈應時須允矣推

先達因之啓後塗傾心瞻斗嶽拭目見眉鬚曠邈宜重

續招邀不再呼會當清燕合身及太平娛高節偏怡晚

深期直過晡香山藉居易洛社重寬夫江右來三俊

明仲

曰川敷五  
皆江右人

吳中得二儒

亨父昂儀  
皆吳人

玄暉才更逸

鳴治

原甫

志非迂

尚質

獨貢荆山璞

賓之

連收閩海珠

師召汝賢  
皆閩人

洋洋

懷泌水

孟陽

落落恥齊竽調律夔音協封山舜業符

是會  
凡十

二  
人  
奇逢如有待雅集幸無渝詩話呈新草歌詞據槁梧

永懷蘭在室盡醉酒盈壺點染爭毫末觀瞻動座隅丹

青差可託卷帙自應俱翠竹鸞儀整蒼松鶴骨癯何勞

問工拙聊足記形模異產關河隔同升雨露濡論交千

古尚投分寸誠孚藝苑聯珂入經帷接佩趨冰銜今豈



遠天路昔非殊禮法從容地才猷次第攄正緣師孔孟  
端合謝軒虞張弛遵前軌荒涼愧此區流傳從竹帛想  
念在桑榆厚意知堪信蕪言恐未愚

南京大司寇周莊懿公挽詩

蒼姬初肇姓陽曲始分支簪紱家聲遠松筠骨相奇  
泮宮虬在蟄鄉榜鳳來儀宦跡驚鵬徙文名憶駿馳遂聯  
青瑣籍真授白雲司被賜逢康伯無冤付釋之平反用  
輕典推鞠盡單詞執法何曾刻存仁豈但慈聖皇更化

日司寇拜官時殊擢由公論孤忠結主知老成符大用  
謹厚見優為懇款惟謀國辛勤復賑饑栢臺厯簡命斧  
宸慰疇咨公庾豐新積留都肅舊規三遷權益重八座  
位偏宜總憲平如水持衡信若著貫城星采淡嘉石露  
華滋惠澤人皆洽雄才世共推勲庸端可紀度量詎能  
窺縱獄追唐史封山陋漢祠乞休雖屢屢倚注正孜孜  
裕後非他術承休並美姿庭堦茁蘭桂伯仲協塤箎身  
向清朝健心於暮景怡抗章還自切解組未為遲北觀

終吾事南歸遂所期  
賴中歐相逸洛下潞公嬉  
大嚼仍加飯微疴忽問醫  
謝安纔夢酉傳說竟騎箕  
未滿羣生望徒傷一老遺  
卹隆天府詔訃動士林  
悲白壁終成瘞青山不費  
貲孤卿傳顯謚太史樹穹  
碑夙荷通家愛長懷共里  
私賓筵三爵又客路片帆  
隨後進深蒙誨前修素願  
師幾年嗟遠別終夕繫遐  
思太息音容隔無從涕泗  
垂不堪千古恨聊託五言  
詩何日經佳兆臨風酌一  
卮

六言律詩

題江景便面

客舟欲渡未渡僧鐘似聞不聞北固羣山遠隔南零一  
水中分

和鏡川楊先生齋居之作

十里春流繞戶半輪晴月當簷齋閣獨眠小榻書窓高  
捲疎簾自笑宦情淡泊還驚詩律清嚴試問謝家草色  
東風已動柔尖

瀛洲舊會承鄭東園邀飲神樂道觀即席次韻

二首

瀛洲舊約始會神樂福地重來最愛乘風琳館何妨步  
月瑤臺杏園芳躅可繼鳳城雅倡宜裁却羨斯文風味  
不負翰苑情懷

南國新看合袂北門舊憶垂紳自是交遊誼重更看傾  
倒情真便判詩酒娛我莫遣風花笑人回首玉堂天上  
江湖未遠嚴宸



青谿漫稿卷三